

東華續錄

東華續錄

冬十月庚辰朔頒同治二年時憲書每歲皆如之○諭內閣駱秉章奏官軍進攻龍穴場疊獲大勝首逆就擒一摺逆首李永和卯得輾自八角寨敗竄龍穴場負隅死拒經駱秉章飭令提督胡中和等督飭各營弁勇晝夜清壕築柵四面合圍八月十八日夜間賊眾拌死突圍疊次撲犯官軍營壘總兵何勝必等督隊徹宵力戰槍礮齊施連日殲斃逆賊甚眾賊勢屢挫奔潰回巢二十一日藩司劉蓉馳抵軍營與胡中和籌商設伏誘賊出巢作一鼓殲擒之計二十二等日該逆復分犯各營均經官軍扼剿該逆不能脫二十五日逆首勢蹙潛至豬市坡胡中和等帶領親兵先至坡下並分派弁兵伏山背總兵蕭慶高等見逆首均已出巢急督各隊分撲賊營賊勢不支官軍當將龍洞埂等處賊巢一律焚毀左右伏兵齊起逆首李永和即李短搭搭卯得輾均立時就擒胡中和復飭將弁將張家溝等處賊巢焚毀戮無遺並救出被脅難民六百餘人逆首李永和等均經訊明正法剿辦甚屬得手駱秉章督飭各軍將積年悍賊悉數殄滅洵屬調度有方深堪嘉尚著交部從優議敘雲南提督胡中和四川布政使劉蓉運籌決勝生擒渠魁實屬異常出力胡中和著賞穿黃馬褂劉蓉著交部從優議敘○諭議政王軍機大臣等前有人奏風聞苗沛霖欲統逆練一二萬人往投勝保恐到陝後句結回匪肆行無忌請飭堵截等語又有人奏勝保自去春督師直東以至入皖入陝所過州縣非索餽千金或數千金不能出境稍有羈留官民尤困隨營之妓甚多供億之資不少又有人奏勝保上年督兵直隸路過衡水悅民間女子招至營中閱看又縱容委員濫賣功牌至今直省拏獲騎馬賊多帶有勝營翎頂執照本日又有人奏勝保以一寒士自帶兵以來家費驟富姬妾眾多揆厥由來總由濫保取賄賂虛勇冒口糧勒派充私橐本年督兵赴皖挈帶眷屬同行女眷大轎有數十乘聞四眼狗家眷亦為勝保所有等語以上勝保貪漁欺罔各劣款係近日節次有人參奏情節大同小異似非虛誣僧格林沁久駐河南安徽交界處所見聞自必較確著即按照所參各款據實覆奏再據本日多隆阿奏報內有風聞苗練陸續已入潼關之語著僧格林沁仍遵前旨迅速相機堵截令其回皖幫同剿擒如不遵理諭即派兵剿擊毋任一人一騎入陝多隆阿一軍不可抵潼關前有旨令其堵截苗練該大臣可即咨照會商辦理將此由六百里加緊密諭知之○諭英桂奏朝邑縣城危急請撥重兵救援一摺前因陝省同朝一帶緊要諭令勝保親自出省前往布置嗣據成明馳奏逆回攻撲朝邑並英桂愛仁王茂蔭等均各馳奏回匪分擾華陰朝邑潼關喫緊各情復經嚴諭該大臣剋日親往調撥動兵迅籌戰守見據英桂奏稱逆回已將朝邑城西民寨攻破並於縣城西北紮營四面圍困潼關以西復有大股滋擾是該處情形萬分喫緊勝保身

爲統帥堂不知同朝地方緊要成明兵單且不得力儻或該城有失逆回散漫河西東擾晉疆南與潼關之賊聯成一片晉豫兩省勢皆震動中原腹地爲患何可勝言乃勝保於前次奏報馬家堡獲勝摺內其同朝糧盡援絕情形並無一語提及且必俟涇陽等處得手始行馳赴東路是直棄同朝於度外該大臣受國厚恩委以關中重任乃於東路軍情視同隔膜疊奉嚴諭竟若罔聞實堪痛恨著卽迅速調撥勁兵親赴東路迅解朝邑城圍力籌掃蕩以贖前愆儻再遷延不進致令該城有失必將勝保從重治罪決不寬貸無謂朝廷屢次優容寬典遂可倖邀也其晉省沿河一帶英桂已添備礮船於朝邑口岸往來巡哨卽著認真嚴密扼要防堵毋得稍有疏虞將此由六百里各諭令知之○諭多隆阿奏行抵樊城督軍進剿陳德才大股賊匪並密陳聞勝保遣員迎調苗練陸續已入潼關見在添兵遵旨赴陝一摺據稱前授荊州副都統薩薩布由陝西差弁至楚詢悉勝保曾遣總兵博崇武前往壽州迎調苗練風聞該練陸續已入潼關等語此事前經寄諭僧格林沁鄭元善毛昶熙等派兵沿途截該大臣等如果先期遵旨辦理或可阻其西行苗練此時是否已入潼關似亦尙未確定日前惟有風聞苗練不帶鍋帳將欲赴陝之信而河南等省近日亦未見奏報惟該將軍刻下須由唐仙鎮折回前往潼關扼截路隔一千餘里誠屬鞭長莫及如該將軍所籌此事關繫非細不可緩圖又不可操之太急均屬洞中機宜著卽就近將總兵藍斯明等三營之兵迅行調取統率赴陝萬勿刻遲一俟行抵陝境如苗練尙未入關自可迎頭堵截卽使該練時已到關該將軍務當觀其動靜相機辦理總期設法暫行籠絡駕馭俾不至驟成巨患方爲妥善該練特有勝保爲護符思乘回匪之亂入關肆其狡謀見在陝回勢正鴟張該將軍抵陝卽須將該省軍情妥密籌畫應卽如何與雷正綰分路剿辦雷正綰所部各軍是否足以獨當一面於該將軍未到以前能否通盤顧及一切機宜均須早爲籌定於行抵陝境卽行飛速奏聞至所請明降諭旨仍命該將軍一軍專辦陳德才股匪以安苗練之心亦屬有見第恐陝省匪徒見之愈無忌憚轉致從而生心本日已於寄信勝保諭旨內將該將軍專辦陳德才一節敘入諒苗練亦必卽有聞知且較明發諭旨更爲密速亦可使其心志暫安不復疑慮矣藍斯明之兵如調到需時多隆阿卽先率所部星馳赴陝務期早日入關以占先著多隆阿所帶之兵尙虞單薄可卽咨商僧格林沁派兵協助見據略秉章奏報龍興場賊巢已破川省軍情漸覺有緒已諭該督於楚軍兵勇暫緩裁撤趕辦石逆等股竣事後亦可調撥入陝援助多隆阿聲望素著此時尤當軍威強盛所向克捷卽苗練等亦必望而知畏加之控御不難矣將此由六百里加緊密諭知之○諭官文奏遵旨察看情形多隆阿一軍驟難拔

東下見擬酌撥何紹彩馳赴江南策應一摺該大臣顧全大局畛域不分深可嘉尙著卽飭令何紹彩統率所部馳赴江

南大營聽候曾國藩唐訓方調遣多隆阿一軍見已入楚仍應駐紮楚豫之交專剿上游髮捻以通豫西驛路而固楚北藩
維兼可扼阻秦關外犯之賊該營將士冒暑遠征奔馳萬里朝廷念其勤勞不忍重加更調楚豫軍事方殷即應責成該將
軍實力勦辦惟潼關十分緊急哈連陞被回逆擁去尚無下落楚豫軍情見在稍鬆該將軍自應懷遵疊次諭旨力顧潼關
不能拔隊東征刻下楚省賊勢若何何紹彩率軍東下見有各軍是否足敷分布並著通盤籌畫務當謀出萬全未可顧此
失彼將此由六百里諭令知之○諭駱秉章奏官軍進圍龍窠場疊獲大勝首逆就擒全股殄滅一摺覽奏甚為欣慰李卯
二逆伏誅餘匪無一得脫龍窠場一股業已肅清惟石逆由川竄黔若不趕緊殲除恐死灰復然辦理又多棘手疊經諭令
駱秉章派兵出境會合夾擊諒已遵辦著即添調得勝兵勇探明楚黔邊防何處喫緊即由何處進剿務將積年巨寇殲滅
毋貽後患郭刀刀一股前據勝保奏餘匪不過千餘人竄入寶雞鳳縣山中恐復竄回川境或與洋縣踞匪合併著即責成
易佩紳一軍盡力搜剿無任再有勾結其鶴遊坪踞匪攻剿尚未蒞事前此兵力不敷是以未能迅速剿除見在川南軍務
漸已就竣亟宜添兵勦辦該督即酌量調遣務當乘此聲威迅即掃除以期一律肅清其洋縣踞匪是否尚須分兵助攻並
著酌度辦理總之精銳之軍易散難聚楚黔軍事方殷各營勇丁斷不可遽行裁撤俾資調撥另片奏林自清請假回籍所
畱勇丁四百餘名已經張亮基在瀘州就近遣回籍內滇練二百餘名撥赴唐友耕行營編入哨隊等語林自清既願畱
川效力何以忽行請假回籍其中有無別情著駱秉章據實覆奏林自清所統練眾雖經散遣恐復勾結生事並著照潘
鐸張亮基隨時查察防範將此由六百里諭令知之尋奏林自清在川張亮基慮其日久生隙諭令回籍當即請假出境並
無別情報聞○諭韓超等奏勦辦石阡等處賊匪續獲勝仗並請飭湖南暫緩撤兵就近借撥軍火各摺片石阡思南銅仁
思州等府屬匪徒經各官軍進攻疊破賊巢並將逆首田餘三生擒正法石阡思南道路疏通著韓超即乘此聲威迅飭各
路帶兵員弁將餘匪力加掃除見在天柱等城南經克復匪黨四竄若楚師驅撤勢必勾結苗匪復行滋擾著毛鴻賓即飭
管帶楚師鎮將畱駐黔疆會同黔軍進剿苗匪為一勞永逸之計前據毛鴻賓奏稱擬調周洪印戈鑑兩軍移銅仁勦辦張
家寨賊匪見在黔省副將慶瑞已督兵進攻張家寨著毛鴻賓即飭周洪印帶兵迅赴該處會同黔軍速行掃蕩黔省丁洵
各營需用軍火若由貴陽省垣運解道阻且長緩難濟急見當攻勦喫緊之時著毛鴻賓由湖南就近借撥火藥五萬斤小
鉛丸五萬斤火繩五萬盤運解黔省下游應用石逆股匪竄入黔境韓超等前已分派兵勇截剿如該逆被黔軍堵扼勢必
東竄楚疆毛鴻賓務宜分撥兵勇於楚黔交界處所扼要嚴防毋令乘隙闖入邊境本日據駱秉章奏生擒逆首李短搭搭

等匪是四川軍務大有起色已諭令駱秉章迅移得勝之師會合楚黔各軍將石逆一股即籌殄滅著毛鴻賓韓超飭令統兵大員實力扼剿共殲醜類毋貽後患將此由六百里各諭令知之○申禁給放甲米抑勒等弊○予貴州陣亡遊擊羅思治等祭葬世職○辛巳李鴻章奏逆匪以我軍既克嘉定必乘勢進剿崑崙蘇僞暮王聽王等糾合蘇州嘉興杭州各處踞賊十餘萬由崑山水陸並進迎拒我師一股由安亭竄方泰鎮圖撲南翔以絕嘉定後路一股由蟠龍竄四江口圖撲黃渡以截青浦來路九月十二三等日北路一股竄近南翔十五日臣令遊擊銜吳建瀛帶隊紮南翔之北臣帶本標親兵及副將郭松林等營均向南翔之西路鈔擊各逆見我軍分路並進向東狂奔其方泰鎮賊經郭松林帶千總李長樂縱馬直入賊隊往來衝殺李長樂手刃三十餘賊逆勢披靡遊擊黃中元參將徐有昇大隊踵至分投檢斬追殺十餘里生擒一百餘名吳建瀛亦於方泰鎮西北攻破賊卡二處生擒逆匪多名內有偽宿衛天軍主將一名訊明正法其南路一股約七八萬人先於初七日自蟠龍鎮至四江口對岸排列遊擊鄭國魁參將劉士奇督隊迎擊總兵程學啟由黃渡帶隊助剿賊勢稍卻該逆又自蘇州陸續添到礮船百餘隻民船千餘隻水陸並進十四日該逆連夜於三江口四江口環紮賊營五座並偷搭浮橋渡江內竄將劉士奇鄭國魁及參將張光泰水陸各營層層圍裹十五日程學啟等各帶隊伍援剿開放槍礮斃賊多名該逆陣勢甚厚屢擊不敵鄭國魁劉士奇兩營均被圍困劉士奇被洋礮子打穿右耳仍裹創督守青浦西北之洋新涇等處賊勢亦熾黃翼升派總兵王東華等分師船為三隊由青浦進援自督親兵繼進逆賊擁擁前來各營且戰且進將至白鶴江見兩岸賊眾一二萬扼斷隘口該處河窄隄高行駛不便黃翼升督隊將附近小橋拆斷阻賊來路始收隊回青臣又派李鶴章等乘南翔北路賊勢稍減抽出江橋五成隊伍由紀王廟前往黃渡與程學啟合軍援擊以期迅殄逆氛又奏連日訊據獲賊供稱李秀城僞暮王聽王黨眾十數萬分守蘇嘉各屬謂嘉定青浦若被官軍克復定必死力來援以拒我軍此次傾巢出竄悍而且眾我軍水陸各營東援西剿應接不暇然誓師苦戰斷無輕棄青嘉兩城之理惟提李秀城率領各股逆眾上犯蔓延甚廣臣早為默慮惟相距較遠臣黃翼升函稱十六日白鶴江之役賊眾船隻致失利蘇州嘉興青浦各來路河湖紛歧警報並至必須添調船隻併力堵擊督臣曾國藩前派總兵李朝斌帶水師三營赴滬察看形勢旋即駛回金陵該提督請將見駐三江營之淮揚水師副將蔡東祥等營調赴青浦以厚兵力查都興阿前調廣東紅單船四十號早經陸續過滬正可協助江防且大服戰垂上援金陵南國下援青浦嘉定江面情形稍鬆應將蔡東祥等二營仍歸黃翼升統帶調遣以資策應而備攻剿又奏疊准督臣曾國藩咨函以大股援賊廣集金陵攻撲官軍濠壘自閏八月二十

日至今更番晝撲書夜不息請派總兵程學啟一軍雇坐輪船趕赴金陵援剿等情查偽忠王兵力較單必當設法派兵援剿曾國藩發函時尚未知嘉定克復程學啟已調紮黃渡前敵見在偽募王聽王各黨恐我軍乘勢入蘇糾合蘇常杭嘉守賊十餘萬由昆太水陸並進圖撲黃渡四江口頭敵營盤程學啟督所部二千餘人晝夜搏戰十餘日尚未解圍臣處各軍赴救不遑若令程學啟遠去松滬更危惟查有三品頂戴白齊文接管華爾常勝軍此次攻克嘉定尙能出力該軍四千餘人打仗向稱奮勇火器亦極整齊臣已飭署藩司蘇松太道吳煦前蘇松糧道楊坊督同白齊文趕緊籌措行裝乘坐輪船駛往金陵協力援應由督臣曾國藩妥爲調遣上諭議政王軍機大臣等逆賊以官軍既克嘉定必將乘勢進剿蘇崑糾合蘇杭嘉興各處踞賊十餘萬水陸迎拒據李鴻章奏稱賊分兩路圍撲南翔黃渡官軍將北路之賊於陸家行方泰鎮疊加剿擊南路賊勢尤眾參將劉士奇等連日苦戰尙未得手經李鴻章抽調北路官軍前往合擊即著激勵各營兵勇將三江口等處之圍併力援解並即將青浦西北白鶴江等處之賊痛加剿洗務使青浦等城勿致得而復失金陵援賊麕集攻撲官軍營壘相持日久廬念時深曾國藩所調程學啟一軍既因賊眾圍撲黃渡四江口營盤晝夜搏戰不能前赴金陵之援李鴻章飭吳煦楊坊督帶白齊文接管華爾之常勝一軍添備船隻駛往援應可資得力白齊文以外國人隸歸中國出力剿賊亦具真心此軍到金陵後曾國藩即督飭曾國荃等善爲駕馭大股逆匪上援金陵甯國下援青浦嘉定江面情形稍鬆都興阿前調之廣東紅軍四十號已經陸續過滬著都興阿催提並督飭帶領水師員弁實力巡緝以助江防即將淮揚水師蔡東祥歐陽利見二營飭令迅赴青浦歸黃翼升統帶併力堵擊曾國藩李鴻章仍將金陵松滬近日軍情隨時具奏以慰馳念將此由六百里各諭令知之○僧格林沁國瑞奏臣等於九月十三日親督馬步各隊進攻亳州迤東劉集捻首蘇添幅老巢牆峻濠深猝難攻取我軍於十四日用礮轟塌寨內房屋甚多恐該逆乘夜逃竄派投誠之宋濬沅帶領降眾在彼巡守該逆果於十五日五更時竄出向南逃遁經宋濬沅帶隊截殺我軍馬隊趕到乘勢進攻擁入該寨殺賊多名當將劉集克復是日劉集迤南之觀音堂踞賊亦聞風南遁我軍追至觀音堂迤南十里之蔣集地方該逆膽敢糾眾來撲翼長舒通額等帶領馬隊奮力衝擊賊始敗退遁入蔣集我軍即於十七十九二十等日疊次進攻旋探得逆首張落刑等復由蔣集迤南之廟集等處率黨來援當經舒通額等帶領馬隊擊退尙未能痛加剿洗臣等自移營劉集以來亳州東南及渦河兩岸大小圩寨從賊捻匪每日俱有來營投誠者亦有棄寨逃走者營總富和總兵黃開榜稟稱宿州永城東南一帶亦有來營投誠各寨均准薙髮歸正查投誠寨內有崔莊捻圩首任心桃稟稱花旗捻首雷彥見赴西路打糧任心桃

將其家屬送交亳州收押以冀該逆即早來歸免在西路滋擾伏思用兵之道招降最難蓋招降必須駕馭得法安置合宜日後接辦得人方無後患刻下雖備以兵威將來仍須地方官妥爲辦理善後見在亳州池東糧道可望疏通臣已委員管帶各投誠勇目及選擇降眾之強壯者驅之使前令其立功贖罪俾以匪攻匪互相爲仇不致再行糾合爲患復嚴飭地方官及團練紳董經理降寨防守事宜廣設耳目明查暗訪設有匪眾滋事擾害良民卽飛報臣營酌量辦理至將來官兵撤後自應分別安插惟在地方文武認真經理可冀日久相安但必須忠正廉能精明幹練之員足當斯任應由撫臣秉公遴選委用賢員方克有濟見在亳州東北一帶擒巢雖經臣等克復多寨而亳永蒙宿賊寨尙多擒首張落刑又自劉集逃南率黨仍思抗拒亟應節節進剿以期迅殲醜類至西甯毫擒見探得姜台凌王懷義等在武關池東被多隆阿大軍擊敗已於本月十四五日由南路潛行回巢容再酌量情形相機剿辦又奏欽奉諭旨以勝保調撥苗練赴陝令臣妥爲阻止查苗沛霖前經臣疊次札飭令其帶練進剿擒巢以冀其殺賊立功並令定於何處與臣面見用授進剿機宜乃據英翰稟報苗沛霖面稱仍往展溝剿除擒巢屬令該員轉稟等情是苗沛霖並不來營面見又有遣人赴陝求勝保調遣之事其爲心懷疑懼已可概見見在該練並無西行之信未便豫爲阻止致啟猜嫌臣已將進剿毫擒情形札知苗沛霖卽詢以何日由何路進隊剿擒見在攻克何處擒巢約計何時可以攻至宿毫與官軍會合仍責令將剿擒情形隨時飛報便知真僞接鄭元善來文以陝州稟報總兵博崇武到州持有護照飭調苗練赴陝擬俟博崇武到洛後再行面詢情形等因是博崇武未到之先苗練不能前往博崇武抵洛之後卽可由鄭元善阻止等語苗沛霖雖云隨剿擒巢並未實在出力謂爲必無反側已難憑信該練如堅欲西行未

必定俟博崇武來調恐其暗中調隊裝扮官軍陸續去是亦不可不防設使該練營行調隊西行亦非鄭元善毛昶熙所能阻止仍應由該大臣嚴密訪查於籠絡之中時寓防維之意如有舉動著隨時迅速具奏本日據毛昶熙奏探聞博崇武已由會興鎮渡河由北岸行走恐其已抵苗營可卽由該大臣傳博崇武到營將迎護苗練入陝一層嚴諭阻止本日並諭知鄭元善飭令該鎮前赴該大臣軍營矣至調苗練進剿擒匪不妨開誠布公使之不疑如苗沛霖立有功績由該大臣奏請加恩開復朝廷無不俯允諒該大臣操縱能權衡悉當也將此由六百里諭令知之○諭僧格林沁之軍自肅清毫北擒巢後復將毫東之劉集觀音堂等處攻克軍威甚振據稱該大臣自移營劉集以來亳州東南渦河兩岸從賊圩寨每日俱有來營投誠者均經准予薙髮歸正刻下雖懾以兵威其善後事宜仍須地方官妥爲辦理等語亳州一帶爲羣盜匯萃之區該處百姓亦皆爲朝廷赤子祇以從前地方官吏未能撫循遂致爲賊驅迫見在僧格林沁移師進剿各圩寨紛紛歸正已由該大臣將投誠勇目降眾委令前驅立功自贖惟撫馭居民安插降眾全在地方文武認真經理懲犯於初起消患於未萌方能日久相安不至大軍一撤復萌叛志且該大臣見督軍深入賊境解散脅從疏通餉道尤爲第一要著設已無圩寨地方官吏處置未能得宜致逆捻復行句煽尤於大營餉道關繫非輕鄭元善身任封圻唐訓方見署撫聚於皖豫善後事宜均各責無旁貸務須秉公遴選擇其廉能幹練之員加之委任與該處團練紳董將一切布置事宜妥爲辦理務使歸正良民悉行樂業如有潛萌叛志者仍當不動聲色密爲訪拏以靖地方本日毛昶熙奏遵旨阻截苗練摺內有苗練並未西行博崇武見由會興鎮北走等語著鄭元善卽飛飭博崇武先赴僧格林沁軍營聽候辦理仍一面確探苗練行蹤遵旨攔截毋令西行將此由六百里各諭令知之○諭勝保等奏督軍馳赴潼關籌剿東西兩路回匪並請調苗練各摺片西路逆回屢受懲創勢已稍衰其由高陵等處來犯之賊復經官軍擊敗殲斃甚多乘此破竹之勢自可漸次得手惟諒路同郡賊勢甚眾朝邑被圍潼關又爲賊眾圍困城中見無主將深恐兵民心亂爲賊所乘勝保見已抽撥兵勇迅赴朝邑力潼關調度攻剿惟同朝一帶情形萬緊勝保自不得專顧華渭置同朝於不顧著卽懷遠疊次諭旨親督兵勇迅赴朝邑力解城圍一面分兵兼顧潼關將該處城圍援解再行相度機宜進剿各處以期先清東路力顧大局該大臣見帶兵二千五百名東行恐兵勢尙單不敷分布仍著於西路各軍內酌量調赴東路以厚兵力毋得恃勝輕敵致誤事機同朝如有疏虞惟該大臣是問所需月餉自應由陝省籌撥卽著該大臣傳知瑛榮令其按月撥給毋許推諉苗練赴陝助剿一節前已飭令該大臣速行撤止該練見已悔罪輸誠朝廷亦寬其既往予以自新若如所奏願爲朝廷效力豈赴陝可云效力在皖遂

不能效力耶且官軍若能攻克回巢則回匪所據之貲財糧米皆可藉資軍餉又何必苗練始能因糧於賊殊不可解聞該練尚在皖省未動而勝保所遣之博崇武聞已由河北前往苗圩調令往陝著即懷遠前旨迅將博崇武撤回並檄止苗練入陝儻固執前見陽奉陰違縱令該練西行必仍將勝保從重治罪決不寬貸懷之將此由六百里諭令知之○壬午諭內閣國家愛養小民常賦之外從無苛派近因各路用兵直省紳民感朝廷二百餘年厚澤深仁捐輸軍餉踴躍爭先雖地方被賊蹂躪而該紳民等仍復樂輸恐後敵愾同仇深堪嘉尚在該紳民等尊君親上原不希冀恩澤而朝廷借資民力必當立予獎敘以酬其報效之忱近來各外省積習相沿民間繳捐後因大吏升遷無定一經交卸即置高閣接任之地方官漫不經心不復催辦以致獎勵虛懸是小民急公奉上而地方官不以上聞何以鼓民心而昭激勵且各省地方大吏受恩優渥偶有助捐軍餉無不仰邀恩澤並有移獎子弟者而小民轉致向隅殊失事理之平著各路統兵大臣及直省督撫遇有紳民捐輸軍餉者隨時分案奏請交部獎勵其前此已捐未經請獎之紳民等並著督飭委員迅速查明嚴給獎敘毋稍稽延將此通諭知之○諭譚廷襄剿淄川踞匪○癸未賜史天祥等四十三人武進士及第出身有差○諭議政王軍機大臣等毛鴻賓奏官軍克復修仁並掃蕩大小青山賊屯一摺張逆遁回蓮塘該處高山壁立不可攀援出入止一小徑該逆連築三卡耕種如常悍賊不下萬餘軍械礮火均極充足毛鴻賓擬先將桂嶺老縣各要隘賊卡攻克以斷外援復得熟悉搖情深知路徑者安撫循人使爲我解散黨與約期並進所籌尙屬周妥蓮塘地雖險峻尙能耕種究不能給萬眾之食若能斷其外援則賊勢必覺著毛鴻賓卽飭江忠義迅將桂嶺老縣等處攻克以期會合進剿黔省逆首姜映芳前據毛鴻賓韓超所奏情節各歧諭令該撫等確切查明茲據毛鴻賓奏稱姜逆因同知吳自發等捕拏甚急繞赴署清江協副將曹元興營中乞降該逆爲積年巨愆屢次勾結苗匪竄踞城池今懾於兵威力竭乞降難保不另滋事端著韓超迅速密查如投誠非出自真心卽行擒拏妥辦斷不可稍存姑息儻將來別有反側惟韓超是問將此由六百里各諭令知之尋韓超奏首逆姜映芳委係生擒正法惟先有伊黨楊大祿投誠之事楚師傳聞訛誤致奏報情形互異報聞○甲申諭議政王再機大臣等譚廷襄奏剿辦教幅各匪情形並贖費光棍回竄各摺片覽奏均悉譚廷襄見飭前敵各營進紮昌平山下環攻恐投順之人反覆無常一意進剿匪首李八等籍隸鄆城見已派參將定順帶馬隊馳往費縣平邑集以杜教匪東竄署副將范正坦駐軍平邑集之東北兼扼幅匪東竄並飭蘭費各文武各帶原隊將著名匪寨逐漸圍攻隨剿隨撫以圖次第廓清所籌均尙周妥卽著譚廷襄督飭各軍實力進攻迅殲醜類毋畱餘孽所稱約計三冬必期蕝事足見該撫力求報稱迅速圖

功如能剋期殲蕩俾東省民生得資休息實屬深慰產系惟克沂等屬教幅各匪此等彼竄肅清非易該撫務當體察情形認真督辦不可專聽各營稟報致爲局員所欺紛飾養癰轉貽後患於無窮也將此由五百里諭令知之○諭總理各國事務衙門奏請飭勞崇光前往貴州查辦事件暨請飭劉長佑與各外國妥爲聯絡消患未萌各等語本日業經明降諭旨令勞崇光馳驛前往貴州查辦事件矣前以田興恕在貴州殺害教民一案曾經疊次諭令寄諭崇實勞崇光駱秉章密查據實具奏該總理各國事務衙門復經奏明崇實素爲洋人信服請將此案卽由崇實辦理以專責成是以本日復明降諭旨宣示所有四川貴州兩省教民案件統交崇實秉公覈辦駱秉章毋庸會辦勞崇光接奉此旨著卽刻日由粵前往貴州將此案會同崇實妥爲辦理該前督更事最久沈毅有爲亦必能設法調處得宜也勞崇光初到廣東卽能挺身入城外國人欽其膽略平素於外國交涉事件亦能推誠相與故該公使等頗深悅服劉長佑於到任後務於廣東交涉外國各事件妥爲聯絡誠信相與使之佩服黃贊湯業已由京赴粵劉長佑將廣西事務妥爲交代迅卽起程抵任後均卽妥商辦理並著勞崇光將一切機宜與各外國如何定議訓練兵丁保護省城未竟各事宜告之劉長佑黃贊湯以便接辦如劉長佑黃贊湯等到任尙需時日卽行詳細告知晏端書先行照辦勞崇光接奉此旨亦卽前赴該省毋稍遲誤粵省河南地方有匪首黃金籠等聚眾謀逆前據勞崇光奏已訪拏正法當經寄諭該前督以其餘黨必多恐與高州等處匪徒暗地勾連務於省城內外嚴密布置並添調戰船妥爲防範該將軍督撫等務須確實查明妥速備禦劉長佑於何時可抵新任迅速奏聞勞崇光起程後晏端書暫署總督篆務不得存五日京兆之心於地方一切應辦事件稍涉疏忽致干罪戾昨有旨令前給事中蘇廷魁前巡撫曾望顏卽行來京由吏部帶領引見該二員見均在籍卽著該督撫等飭令速卽來京毋或遲延將此由六百里各諭令知之○以晏端書暫署兩廣總督_{由左副都御史署}○命前任兩廣總督勞崇光仍以頭品頂帶馳往貴州查辦事件○命成都將軍崇實辦理四川貴州兩省教民案件○乙酉諭內閣前因鄭元善奏參署河南臬司洪貞謙帶兵遷延並捏報地方肅清請撤兵回省等情當經降旨毋庸署理按察使並先行交部議處茲據多隆阿奏稱洪貞謙屢報打仗情形均屬不實又報在新店鋪地方擊賊獲勝經多隆阿密查並無出隊之事洪貞謙以監司大員經朝廷特簡署理河南臬司並令帶兵剿賊宜如何激發天良力圖報效方爲不負委任乃遷延日久並未出隊輒敢以打仗獲勝捏詞稟報似此居心巧詐實屬溺職孤恩記名按察使洪貞謙著卽行革職以示懲儆○曾國藩奏僞侍王李侍賢大股由浙江起至金陵與僞忠王合力猛撲更番疊進迄未休息至九月十二日兩處地道同時轟發土石上飛賊眾踰牆而進前者既殲後者復登賀

國荃督飭諸將竭力堵禦搶險三時缺口幸均堵住擊斃悍賊極多十三日以後賊鋒少衰白晝不甚環攻夜間仍輪流偏撲連荼百餘壘於官軍營濠之外相距不過二十丈復開地道三處希圖一逞自閏八月二十日起計堅守已滿一月曾國荃所受槍傷漸已結痂軍心尚屬完固大局可期平穩惟前此各營病卒未痊近又傷亡一千餘人若無大枝勁旅從外夾擊深恐難以解圍甯國賊目黃汶金胡鼎汶等久盤踞於高嶺梅嶺新河莊等處時竄灣沚紅楊樹一帶意圖鈔我糧路張運蘭病未痊愈堅守郡城之內鮑超病體痊愈即擬將高嶺梅嶺之賊痛剿數次以挫兇鋒其前在甯國縣城失守者爲降將章志俊洪容海兩部鮑超見亦飭其收集潰散重整隊伍隨同進剿甯郡一路軍情漸可得手自閏月中旬大股猛撲金柱關又分股上犯蕪湖自東壩搶過之賊船亦麇聚於金柱關上下官軍守金柱關者水陸僅羅逢元朱南桂彭楚漢丁泗濱等營兵力不厚九月十八日朱南桂與守蕪湖之周萬倬吳坤修等營由龍山橋暗渡合水師齊進痛剿陸師自青山包鈔而上將羣賊蹴僞落水溺斃不少水師奪賊礮船五十餘號從此賊舟無窺伺大江之慮而內河之灣沚三汊河亦均有官軍戰船扼守至臣前調王可陞一軍馳赴雨花臺幫同防守厥後王可陞帶三營先赴金陵雷兩營仍防蕪湖前因蕪湖事勢已鬆即將兩營全行拔去又前調上海之程學啟一軍因防守黃渡要區不能抽動李鴻章擬調洋將白齊文一軍來援金陵都興阿未接臣咨僅接曾國荃一函立派楊心純等千八百人渡江協防實屬力顧大局前調浙江之蔣益澧一軍旋接左宗棠復函因日內正攻龍游湯溪兩城功在垂成礙難抽撥他往蔣益澧既不能棄湯溪而換防甯國則鮑超亦不能棄甯國而先援金陵徵兵千里之外本難處處應手至李世忠一軍臣前咨調渡江由孝陵衛北路而來夾擊僞忠王一股旋因該提督來文有江防空虛南賊分股北竄之說臣即飛咨止調令其專防北岸九派洲一帶又因該提督來文有挑選精壯萬餘派員統援金陵之說臣又咨令自行酌量力難兼顧則專防北岸力能兼顧則分援南岸聽其自爲裁奪金陵十二日之戰金柱關十八日之戰容侯接到稟牘另行詳報上諭議政王軍機大臣等曾國藩奏彙報近日軍情一摺賊匪圍攻曾國荃營盤見仍開空地道冀圖一逞該營損折不少必得大支勁旅從外夾擊方能解圍見在邵興阿已派楊心純帶兵渡江李鴻章復派吳煦楊坊統帶白齊文常勝軍四千人赴援金陵前據官文有調撥何紹彩六營赴援江南之奏若各軍陸續趕到內外夾擊必可立解重圍常勝軍雖非該大臣所願調然既已赴援即須加意籠絡俾八知感奮自能所向有功如其情形驕悍即嚴飭吳煦等妥爲鈐束李世忠有挑選精壯萬餘派員統援金陵之說該大臣咨令自行裁奪固爲合宜惟袁甲三見在將次離營李世忠一軍曾國藩仍應妥爲籠絡令其心有繫屬以便奮勉圖功本日據袁甲三奏李

世忠縣派記名提督董占品統帶萬餘人渡江助剿曾國荃以近日軍情已鬆毋庸再行撥隊答覆已諭袁甲三飭令該提督力勦九洲洲能將該處攻拔朝廷自必立加懋賞以獎其功即著曾國藩傳諭李世忠知悉至蔣益澧既因龍游湯溪正在得手未能換防甯國應否仍須調令來皖著察度情形與左宗棠籌商辦理金陵十二日之戰金柱關十八日之戰其詳細情形並著查明具奏將此由六百里諭令知之○諭袁甲三奏遵旨暫緩回籍擬俟唐訓方到臨即行交卸一摺前因皖省南北軍務同時喫重諭令袁甲三於李續宜回任後再行起程茲據奏稱竄鄂之賊經楚師痛擊敗回河南皖省邊境見已解嚴金陵甯郡軍情均極得手並接據唐訓方面稱已擬勉期就道星速赴防請俟唐訓方到後即行交卸以免病軀貽誤等語金陵及楚北軍情本日據曾國藩多隆阿等馳奏與袁甲三所奏大略相同皖南上下游軍務見已稍鬆該大臣因天氣漸寒病復增劇恐以病軀久待致有貽誤自係爲慎重軍務起見著准其即於唐訓方到防後交卸起程見在皖南楚北之警均已解嚴唐訓方自可毋庸久駐安慶即著統帶所募楚勇五千名勉日馳抵臨淮接統袁甲三所部將各路防剿事宜妥籌布置以專責成其欽差關防即由袁甲三封交唐訓方暫行收存以昭慎重至李世忠一軍前經曾國藩檄調渡江助剿該提督擬撥萬餘人南渡並以賊眾意圖北犯飭江北各營加意堵剿足見忠勇性成果於任事深堪嘉尚惟本日據曾國藩奏江南軍情近日稍鬆能否撥隊仍由該提督酌量等語見在九洲洲之賊仍日久未下李世忠自應嚴防此股力扼北岸爲是且攻賊之要隘即可牽制賊勢著袁甲三飭令該提督迅將九洲洲攻克力爭要隘以固江防如兵力有餘再由該提督酌撥渡江唐訓方抵臨淮後並著將李世忠一軍加意拊循使其奮勇立功不至因袁甲三交卸稍有鬆動是爲至要將此由六百里諭令知之○諭官文多隆阿等奏回援楚境屢獲全捷襲河池北肅清各摺片本日已明降諭旨將商南出力之陶茂林照請獎敘襄樊出力將士准其擇保洪貞謙即行革職趙既發革職永不敘用金順革職留營矣此股髮逆係賊首陳德才等所統爲四眼狗部下悍賊尚有一萬四千人勢必回竄皖豫多隆阿自應將此股賊匪乘勝殄滅惟此時楚豫交界情形稍鬆而陝省同朝一帶賊勢較重成明一軍兵力本單又在朝邑被圍城內糧草缺乏勢頗岌岌潼關副將哈連陞爲賊所擄關城被圍勝保見雖督兵赴華渭一帶進剿而兵數較單亦有不能兼顧之勢前因官文奏請將多隆阿一軍留駐楚豫交界地方剿賊曾經寄諭允行此時陝省情形較重於楚多隆阿自應先其所急馳赴潼關解圍進剿華渭俾勝保得以專顧同朝陳德才等股匪見雖竄入豫境難保不伺擾楚疆即著官文揀派得力將士越境剿除務將此股殄盡以除後患馬融和股匪見擾黃安一帶並著官文嚴飭在事文武實力剿防毋令與陳德才等股匪歸併豫省軍

營虛報勝仗藉詞退避殊堪痛恨金國琛梁作楫等亦蹈此習該員等於賊至襄陽老河口時並未打仗佐領安圖富森保等亦未出隊以致逆眾長驅闖入楚境著官文嚴行查參從重懲辦以儆效尤豫省軍營習氣甚重此後該省帶兵文武各員如有仍蹈洪員謙惡習者即著多隆阿隨時參奏趙既發私帶口糧擅自離營前赴漢口情殊可惡經多隆阿從嚴參處所辦甚是惟該革員本係由賊中投誠之人如不准其赴各營效力難保不窮而爲盜是以本日明降諭旨僅將該員革職永不敘用將來如有別路各營奏調該革員時朝廷自有權衡也嗣後該將軍營中遇有此等人察看其人可用則留之如實在不堪用難保不去而從賊者不如竟予正法以絕後患前據官文等奏稱姜台凌股匪復由襄陽回竄襄境金國琛勦辦疊勝亦難保非捏詞虛稟仍著官文確查具奏將此由六百里各諭令知之○以襄河肅清予總兵官陶茂林以提督用○以擅離營奪提督趙既發職永不敘用○丙戌 文宗顯皇帝 孝德顯皇后升附 奉先殿禮成 上親詣行禮○諭議政王軍機大臣等前因袁甲三奏由固鎮湖溝進攻李成等老巢由宿州進攻較易當經諭令吳棠等妥籌勦洗茲據該署漕督奏稱黃開榜所部進駐宿州分紮濉溪口勦辦正當得手一經移動恐生他變湖溝本係臨營派令防剿此時請仍由臨軍先行相機進擊一俟黃開榜可以移師再行前進等語所奏亦係實在情形清淮防軍本形單薄湖溝既本係臨淮派兵防堵即著唐訓方飭令官軍相機進剿該處距臨稍遠轉運軍火糧餉較難並著唐訓方與吳棠籌商轉運俟黃開榜可以移軍再行前進該署漕督等同辦一事務當和衷籌商萬不可稍分畛域方於軍務有益並著僧格林沁妥籌兼顧庶不至賊合我分以期迅速殲除將此由五百里各諭令知之○諭景紋奏行抵鎮城土目構爭撤站阻滯不能前進一摺中膽對野酋工布朗結帶領番眾於土司所屬各處滋擾明正土司甲木參齡慶與工布朗結等構怨動即撤站往來各差多有阻滯前據駱秉章奏該野酋擾及明正邊界當經諭令該督飭令都司謝國泰等剴切開導並飭土司兵弁嚴扼邊隘見在該處仍復肆擾是其不遵理諭已可概見雖經景紋派員籌辦恐不能震懾其心消其桀驁川省軍務甫有起色僮邊界不靖釀成巨患將來辦理又形棘手著駱秉章仍遵前旨迅派委員馳往彈壓代爲剴斷俾兩造悉皆折服庶不至再有分爭若該番眾等任性抗違即當備以兵威俾斂迹歸巢不至尋釁爭鬪肆出紛擾是爲至要滿慶辦理西藏事務諸多未協景紋奉命前往查辦刻不容緩一俟道路疏通著即迅速前進毋稍遲延將此由五百里各諭令知之○丁亥諭內閣前因貴州貢生黎庶昌條陳時務由都察院衙門代奏當經諭令該衙門轉飭該貢生將應陳事件詳細具呈茲據都察院據呈代奏詳加披閱其中雖有更改舊章事多窒礙之處聞亦有可採擇業經另行降旨施行並交該衙門分別覈議外黎庶昌

以邊省諸生施惻陳書於時務尙見畱心方今延攬人才如恐不及黎庶昌著加恩以知縣用發交曾國藩軍營差遣委用以資造就該員其勉圖實踐用副殊恩○諭嚴樹森奏軍功保舉請停止記名潘臬等語所奏甚是上年因軍營保舉冒濫曾經諭令吏部明定章程非克復城池不准保至記名道府原以人才難以兼長嫻於將略者未必諳於吏治一經簡用轉違其才迨經諸事廢弛不能不治以罪未免可惜此朝廷於慎重獎敘之中實寓愛惜人才之意況藩臬大員官職較崇必須朝廷特簡如果軍營人員有能兼勝錢穀刑名之任者各路統兵大臣及直省督撫不妨隨時密陳將其所長詳細註明以備簡用若遽以藩臬爲酬功之階轉致用非其長且於體制不合嗣後軍營保舉記名藩臬之處著卽行停止將此通諭知之○諭官文等奏請將債事之文武各員分別懲處一摺河南髮捻各匪經官軍擊敗後屢次窺伺楚境意圖竄擾經官文等檄調道員梁作楫由襄陽馳赴隨州扼要防剿安襄鄖荆道金國琛不遵調度輒將梁作楫一軍畱守襄樊梁作楫復因病延宕致誤師行賊遂得潛渡白河擾及東陽隨州等處皆該員等貽誤所致迨經派兵追剿又不善於布置致令事權不一師出無功總兵彭炳武與賊接仗獲勝任令所部搶拾賊中輜重致賊回撲傷斃多人副將唐敏興應帶勇丁沿途滋擾毫無覺察均屬失於約束金國琛著革去布政使銜拔去花翎降爲同知畱於湖北酌量補用梁作楫著卽拔去花翎彭炳武著革去提督銜以遊擊降補唐敏興著暫行革職梁作楫彭炳武唐敏興均著暫畱軍營效力如再不知奮勉卽行從嚴參辦○諭議政王軍機大臣等前因僧格林沁奏札調蔣凝學由西南督隊向沙河東北進剿當經諭令唐訓方遴派委員接替鎮守茲據該署撫奏稱賴壽正陽等處良莠不分蔣凝學以一軍分布三處兵力尙單別無委員可以接替請暫免更動等語賴壽正陽等處甫經歸順地勢極爲緊要苗沛霖名爲助剿既不謁見僧格林沁又不將剿擒情形詳稟而轉請勝保調赴陝西是僧格林沁思用其力而該練仍懷叵測不得不倍加慎重唐訓方所奏蔣凝學請暫緩更動亦係爲大局起見第僧格林沁已深入皖境該大臣忠勇性成志在剋期滅擒而主客之勢非有皖軍接應其勢較孤蔣凝學見難未能前進仍著唐訓方飛催新募之軍赴皖以便蔣凝學得以隨同僧格林沁進剿並著僧格林沁相度機宜妥爲籌商該大臣素顧大局諒能和衷辦理也唐訓方見抵臨淮皖北甫經克復亟宜培養地方元氣著卽認真派委循良之吏招集流亡勸課農桑如有成效准其酌保吏治民風均宜畱意毋得視為迂闊勉之將此由六百里各諭令知之○諭前因羅惇衍賈楨先後奏請飭李續宜回皖並因皖省軍情喫緊疊經降旨催令赴任見在皖省軍務雖稍形穩順第唐訓方於該省情形恐尚生疏且威望亦不如該署撫遠甚諒此時葬事已畢病已痊愈卽著迅速起程毋稍遲緩將此由六百里諭令知之○諭

前因陝西軍情緊急疊次諭令多隆阿督帶全軍馳援潼關並諭官文迅派各軍追剿由楚竄豫股匪俾多隆阿迅速督軍入陝嗣據多隆阿馳奏援軍屢獲全捷襄河迤北肅清接奉廷寄已遵旨馳回樊城本日據官文等奏官軍進剿髮逆獲勝敗賊由應山竄回桐柏捻匪張落刑等竄至新野縣境經多隆阿派隊扼其東竄親赴隨州剿辦等語官文等此奏自係向未接奉續寄諭旨得悉多隆阿必須入陝情形多隆阿由樊城啟程赴陝計程應已入陝境所部各軍亦陸續可集見在行抵何處即著該將軍迅速馳奏陝回猖獗已極必須厚集兵力痛加剿洗著多隆阿嚴飭各軍剋日進關相機進剿毋得稍涉延緩其陳德才股匪見已竄入豫境豫省素無大支勁旅深恐不能殄此巨寇刻下楚北軍務較為得手官文素願大局著仍遵前旨揀派得力將士越境剿洗就地殲除俾楚豫邊陲共臻安謐前據僧格林沁奏捻首張落刑自劉集逃竄率黨抗拒其姜台凌王懷義等匪經多隆阿擊敗已由南路潛行回巢刻下楚豫之交有無該捻餘黨並著官文飭令在事員弁確探賊蹤逐一搜捕毋畱餘孽嚴樹森另摺奏鄂省被匪竄擾請將應解漕折銀兩暫緩籌解等語髮逆捻匪闖入楚疆擾及德安漢陽等府所屬地方漕折銀兩未能按限催徵而添募營勇籌濟飢軍以致庫款支絀自係實在情形惟此項漕折銀兩係採買米石彌補京倉之用關繫甚鉅斷不可再事遲延所有湖北省欠解咸豐十年漕折銀五萬兩仍著嚴樹森督飭藩司趕緊籌解見在髮捻各匪被剿他竄楚境漸就安戢其本年漕折及十年漕折二款均著該撫設法催徵務於年內起解到京以供支放毋得稍涉推諉致誤要需前據多隆阿奏風聞苗練已陸續入潼關嗣經僧格林沁毛昶熙查明覆奏該練向無起程消息已嚴諭各路一體堵截惟陝省回匪情形甚急多隆阿當遵奉前旨檄調所部星速入陝俟抵陝境即行馳奏毋稍遲延將此由六百里加緊各諭令知之○諭江忠義奏遵旨赴黔緩陳艱難及籌畫情形一摺據稱江忠義與田興恕在臨江寶慶地方兩次剿賊均未同駐一處以故田興恕所部無一相識之人職相接統恩誼不能相孚必須募勇近萬督率入黔方足以資分布擬即親赴省城與毛鴻賓熟商辦理各等語自係實在情形即著江忠義迅赴湖南省城與毛鴻賓將募勇事宜妥為籌辦並著毛鴻賓將積欠江忠義舊部口糧清還並將赴黔行糧及新募軍裝經費等款發給俾利軍行毛鴻賓於鄰封軍務素能不分畛域況安黔即所以安楚該撫必能籌畫合宜也至黔中苗教各匪叛服無常田興恕入黔之始所向克捷乃此虜彼起迄無成功近來石逆又竄黔疆內患外寇紛至沓來若非一支勁旅入黔痛剿更恐賊勢蔓延不可收拾江忠義既具報賊報國之志務即趕緊料理一俟募勇成軍即行迅速起程毋稍延誤將此由五百里各諭令知之○子湖北陣亡參將周昌保等祭葬世職○戊子命吏部尚書瑞常協辦大學士○己丑 慈禧皇太后聖壽節

傳止

升赴善宮

○命大理寺卿曹毓瑛在軍機大臣上行走○庚寅諭議政王軍機大臣等鄭元善奏進擊捻股立解臨

潁城圍粵逆回竄桐柏徽調宛軍堵擊及項城團勇攻克曹寨並歷陳豫省兵餉兩虧官民交困情形各摺片竄豫捻匪被

官軍擊敗後聯絡馬步由襄郟東趨臨潁圍撲縣城副將楊長春陳祿興會師進剿斃賊六七百人城圍立解即著鄭元善

等嚴飭該副將等跟蹤追躡盡殲醜類毋任乘隙歸巢粵逆由楚境闖入桐柏之平氏接壤信陽歐陽正塘等軍業經湖北

撤回設邢集等處匪徒勾合粵逆剽掠更形棘手鄭元善因豫省將領乏人函致官文將派往勝保軍營之副將劉車龍撤

赴南陽接統洪貞謙所部據稱該副將曉暢戎機藉資統率官文素顧大局著即飭令劉車龍暫於豫省督率兵勇探明粵

逆蹤迹實力堵剿惟南陽一帶兵勇不過二千餘人而粵捻尚有數萬深恐兵力不厚難以剿洗並著官文恪遵前旨揀派

得力將弁越境跟追會同劉車龍所統豫軍併力兜剿俾楚豫邊患一律肅清於該兩省軍務均有裨益見在河洛安謐鄭

元善擬即移紮汝州期與南陽汝甯聲息相通著即照所擬辦理隨時相機援應該副將劉紹祿竄踞曹寨經項城縣知縣陳

桂馨督勇集團奮力進攻立將曹寨克復該匪見由白楊樹等寨竄走亟應添派兵勇會剿以靖捻氛參將尹嘉賓一軍見

在汝營未能撤動總兵趙鴻舉業經毛昶熙派往陳郡防剿著該侍郎速飭該總兵就近馳赴項城督同該縣鄉團迅將白

楊樹賊巢攻拔毋誤事機鄭元善所奏寇警頻仍事機錯迕餉需支絀亦係實在情形當此時勢孔艱該撫由縣令擢任封

圻受恩甚重總當力圖報稱勉副委任豈可以智勇俱困等詞稍存諉卸至髮捻各匪先後由豫境竄入鄰封甚至頻數往

來毫無堵截亦何能免旁觀之訾議至謂赴秦兵勇絡繹不絕驛站之馬騶去而未歸民雇之車扣畱而勒贖此等騷擾情

形殊堪痛恨當時即應破除情面確查參奏懲一儆百不知該撫當時又何以容去日月也以巡撫而猶有受制於人之處

司道以下等官又當何如撤任南汝光道趙書升參款尙待查辦何以官文前奏之今以仁同趙書升將院溝等處援賊擊

退並著鄭元善查明覆奏鄭元善另摺奏汝軍擊敗援賊平毀二十餘壘該匪負隅抗拒亟宜迅圖撲滅見在援賊已敗著

即責成張曜督率故防諸軍攻克老巢勿畱餘孽將此由六百里各諭令知之○諭勝保照麟奏行抵潼關探聞同朝賊情

並晤籌東西兩路情形一摺同朝回匪司經官軍擊退第匪情猖獗難保不去而復來成明力難獨支勝保既畱照麟駐紮

潼關即可分身前往著即督飭所部親赴同朝無令賊騎渡河擾及晉疆照麟見抵潼關即著暫畱駐紮俟穆騰阿到後迅

赴陝甘總督新任該處自哈連陞被賺後官軍潰散著勝保酌撥形如可將馬德昭調回即行隨同赴甘妥商布置雷正綰

專辦西路剿匪如涇陽解圍即令酌量進兵鳳翔情形見在如何兵勇畱於該關俾資鎮守回匪見有西趨之勢甘省尙屬